

con il qual, benchè anche con tutti, ho zà parlato: la retroguarda de la qual sarà capo el Dolfin monsignor de Lanson, ch'è cugnato dil Re Sarano 22 milia lanzichenech, de li quali sono già pasati avanti da 17 in 18 milia, et li altri si expecta fra quatro zorni, che si chiama la banda negra, perchè tutti quelli 5000 che vengono sono vestiti de negro, lanze negre, e tutto negro. E capitano de tutti li 22 milia lanschenech sarà el ducha de Geler in persona, qual intrò in questa terra el zorno ch'io intrai, fo a dì 16 di questo, et eri lo visitasemo a casa. È homo di anni 45, baso de persona, de bona gravità, parla bon francese, et molto afecionato a le cosse de qui. Ne disse, *inter cætera*, che mai principe christiano ave la piú bella compagnia de fanti de quello l'ha conduto lui a la Christianissima Maestà per questa impresa, et si offerse molto a far e dir asai per la Illustrissima Signoria nostra. Oltra ditti fanti, ne sarano poi guasconi forse 8000, ancor de dicti miera ogniun parla al modo suo; ma il Re de boca propria me ha dito ch'el harà in tutto fanti 30 milia pagati, oltra li venturieri. Li homeni d'arme fin qui sono zonti 1200 lanze et ogni di zonzeno di le altre; ad ogni modo passerano 2000, ma ancor non vi posso dir el certo *quidquid alii dicant*; così non vi posso dir li capi de esse et li nomi. È tre zorni ch'io son arivato qui a la corte, et sempre sono stato ocupato in visitar et in esser visitato et in altre facende, che non ho mai riposo. L'artelaria tuta è zonta e pasata avanti; la plui stupenda cosa che mai si vete al mondo; saperete poi, per altre mie, el numero et qualità. Concludete, che venendo, la Maestà dil Re mena con sè tutto el suo forze d'ogni sorta, perchè a sta volta ge va tutto l'honor et tutta la vergogna sua. Li guastadori vanno in gran lissimo numero, et io ne ho incontrati per camino 1200, con le sue zape in spa'a, che venivano de Bretagna. Io ho visità la Maestà Christianissima, la qual mai volse che li basase la mano, ma mi abrazò et raccolse con demonstrar grandissimo apiacer del mio ritorno. Et mi disse, expedito l'impresa di Milano, voleva poi venir a veder Venexia; sichè tien certo el vegnirà.

254 *Sumario de una letera di sier Marco Antonio Contarini di sier Carlo, data in Lion a dì 17 Luio 1515, scritta a sier Batista suo fradello.*

*Frater carissime.*

Heri matina zonzesemo qui a Lion. Havemo sollicità el cavalcar da Paris sin qui, perchè li intendesemo el Re vegniva in diligentia a Lion, et nui pen-

savamo zonzarlo a Molins; ma con gran diligentia è venuto, che quasi 8 zorni avanti l'è zonto qui de quello siamo zonti nui; per le publice intendereti il tutto, e tutto è la verità. Nè mai, per dito de ogniun, insì el piú bello exercito de Franza de quello sarà questo: haverà piú de 3000 lanze e de 30 milia fanti senza venturieri e altri cavalli, de li quali non ne pol cazar via tanti quanti ge capitano de hora in hora, che tutti voleno andar a la guera. Havemo incontrati tanti fanti in camin ch'è una maraveglia; ma el forzente da poco, al mio parer, et el Re ha optimo parer a non li voler. Da Paris fino a Lion coreno tanto le strate, ch'el par ch'el sia una fiera: povereti per le strade che domandano per Dio, come se fusse el perlon; *tamen* non havemo patito aleun sinistro, perchè tutte le ville e terre sono hostarie come sai; pur l'è un poco piú caro el viver. Heri, quasi a mezo zorno, do hore poi zonzesemo nui, zonse qui el duca de Geler; doman si aspeta dei 6000 lanschenech ch'el dia menar, 3500; el resto a la fin de la settimana sarano qui senza dubio; cussi come zonzeno le zente d'arme et fantarie, cusi se aviano verso Garnopoli. Questa matina, el Re de so bocca ha ditto a li ambassadori, ch'el vol andar al tutto lui medemo in persona, et ch'el vo', o vincer o morir. L'è pasata sti zorni la piú bella banda de artelarie che sia mai stà vista per ditto de ogniuno; dicono che li cavali de artelarie sono da 4000 in suso. Andrea Rosso secretario, che ha pratica, dice poder esser, perchè in la artelaria se intende tutte le munition, et cusi se potria creder al manco di la mitade. Li ambassadori seguirà il campo lontani una zornata e piú, e si haverà de li miglior alozamenti si potranno aver, che cussi ne ha promesso il maistro dil campo. Hora hora, avanti la nostra hostaria, è stata fata la crida, da parte de la Maestà del Re, che tutte zente d'arme se atrovano in questa terra, in termine de tutto hozi se diebano partir de questa terra, soto pena de la vita, et andar a Garnopoli secondo li ordeni di sui capi, perchè Sua Maestà ha deliberato de andar in persona in Italia a recuperar il suo Stado de Milan, e chi farà valentemente, oltra l'honor, haverà grandissimi premii da Sua Maestà. *Item*, che tutti mercadanti possino condur liberamente robe de ogui sorta et vituarie driedo el campo, perchè sarano cusi sicuri come se fusseno in Lion proprio; et oltra il pagamento, Sua Maestà li acharezerà et donerà etc. Tegno senza dubio, l'altra settimana comenzaremo a passar li monti; sichè si tien per certo sarà fata, come die esser, avanti mezo Avosto. Non altro: Idio con vui etc.